

## बिलाप

**ब्रेक्ब मुर:** एको किताब येरमीयामी ब्रेक्शो बाक्ब।

**गेना ब्रेक्शो:** एको किताब ५८७-५८६ बि. सी. परमप्रभु यावे आ खिं नु यरूसलेम खतम दुम नोले ब्रेक्शो बाक्ब।

**मारदे ब्रेक्शो:** येरमीया आ सेल्शो बिलाप ५ ओटा कुम्सो बाक्नीम। मेको कुम्सोपुकीम मार लोत्र बाक्ब देशा हना:

१. डोंइती डा लोत्र यरूसलेम सहर वोंइश बेक्शो मीश खोदेशो दुम्शो बाक्ब।
२. आ नोले डा लोत्र परमप्रभु यावे आ निसाफ पचा आ पर्बम बाक्ब।
३. नोले डा लोत्र ब्रेक्बमी आंम आ पर्बम ब्रेक्ब।
४. नोले डा लोत्र लेंशा ठेयब श्येत आ पर्बम बाक्ब।
५. मिनु नेल्ल क्येडा नोले डा लोत्र “परमप्रभु, गे लेत्चा गेयीनी” दे पुंइतीक बाक्ब।

यरूसलेममी “वारच पने” दे पुंइशो

1 मेको सहरम गिश श्येत्य दुम्मे। डोंइती मेकेर शुश मुर बाक्तेक्म। मेको आ वोंइश बेक्शो मीश मुर खोदेशो दुम्त। मेको डोंइती रागी रागी आन दातेमी ठेयब बाक्त। मेको रागी पिप आ तमी खोदेशो बाक्त। मुल मेको सहर वाइल खोदेशो दुम्त। येरमीया ५१:५

2 मेको नाक्दो हिशेक पा डाक्ब। आ प्रेक्क यिना यिन बाक्नीम। मेको आ दाक्शो मुर आन दाते डा सुइम मेको कली आ थुं बारपाइक्चा डा लोत्र मपाइनीम। आ वारच नेल्लेम मेको कली प्रोंइतेक्म। मुल मेको आ जोरी सत्रु दुम्तेक्म। भजन संग्रह ६९:२१

3 यहूदा श्येत जशा, ग्याइशशा लाइक्चा पुंइसाक्व। मुल श्येत पा गेय पाइब दुम्त। मुल मेको रागी रागी डा मुर आन दातेमी बाक्ब।

नाइक्चा कली बाक्तीक मबा। आ कली खेदा पाइबपुकीमी मेको कली श्येतमी ग्याइशशा लाइक्तेकम।

4 सियोन लतीक लां रोंका पाइनीम। मारदे हना सुइमी चाड मानेचा कली मेकेर रे मगाक्नीम। सहर डा ठेयब लाप्चो नेल्ल श्येत्थ बाक्नीम। आ चढेबपुकी हुकयी पाइनीम। आ मीश आल सुर्ता पाइनीम। मिनु सहरम श्येत जशो बाक्ब।

5 मेको आ जोरी सत्रु आ होत्रप दुम्तेकम। मेको आन मालशो शुश ताइनीम। मारदे हना परमप्रभु यावेमी मेको आ शुश हेंथे पशो तशा, यरूसलेम कली श्येत गेप्टु। मेको आ आल ग्याइशशा लाइक्चा पुंइसीशा, आन जोरी सत्रु आन डोंइती लाम्तेकम।

6 सियोन आ तमी रे पा आ मान पचा पुंइसीतीके नेल्ल लने थुम्तु। आ पिप आ तौपुकी जोतीकेम थिशशो रोकोश खोदेंशो दुम्तेकम। मेको बोल मपाइशशो दुम्शा, आन कली खेदा पाइब आन डोंइती प्रोक्ना प्रोक्न बाक्नीम।

7 यरूसलेममी ठेयब श्येत जतीक नु सुर्ता पतीक नाक्ती जाक्चा क्येडा डोंइती आंम के बाक्शो शोंप नेल्ल मिम्ब। मेको आ मुर आन जोरी सत्रु आन गुइमी गेचा पुंइसीची ना सुइमी मेको कली वारच मपाम। आ जोरी सत्रुम मेको आ श्येत तशा शुक्शी पाम्तेकम।

8 यरूसलेममी ठेयब पाप पाप्टु। मोपतीके मेको शुक्शी पाइक्चा पुंइसाक्व। डोंइती मेको कली मान पाइब नेल्ले मुल महिकनीम। मारदे हना मेकोपुकीमी मेको कली शिश्रा ताम्तेकम। मेको आंमान हुकयी पा आ कुल ख्रुइक्ब।

9 मेको आ ग्रांग्रा दितीके आ गुनेमी केम्साक्व। मेकोमी नोले डा नाक्त ममिम्त। मेको आ तशो श्येत हिंचा डा बाक्त। आ थुं बारपाइक्ब सुइ मबाक्म। मेकोमी “परमप्रभु यावे, आं श्येत कोत्रडीन। आं जोरी सत्रुमी आं कली ग्रातेकम।

10 आ जोरी सत्रुमी आ शोंप नेल्ल रोइक्ताकयीमी। गे मेको आन कली इन बाक्तीके खिंम ओत्रचा मगेतीनी हना यो, यरूसलेममी

रागी रागी डा मुर इन खिं ओव्रचा ताम्तेक्म। येरमीया ५२:१७-१९;  
ब्यवस्था २३:४

11 मेको आ मुर नेल्ल हुकयी पा, अन्न माल्ना माल्न गाक्नीम।  
लेंशा बोल्यो दुम्चा कली आन शोप लेयनीम। परमप्रभु यावे, मुल  
आं कली कोव्रडीन। गो महिक्सीशो दुम्ती” देंती।

12 गे एको लां रे पा लाइब तशा, आन पबर्म मारेइ ममिम्नीनी?  
एर ओंथ नेल्ल कोव्रडीन। आं श्येत क्येडा यो अरु हिंचा डा श्येत  
बाक्बा? परमप्रभु यावेमी आ शुश गाइक्तीकेमी आं कली मेको  
श्येत गेती।

13 मेकोमी इर रे मी सोइक्ताक्व। मिनु आं रुश आगा  
ओव्रपाइक्ती। आं खोइल कली ग्याइल दाइशशा रेप्पाइक्ती। आं  
कली आ डोंइती रे तिल्ली। मेकोमी नेल्ल नाक्त आं कली मुर  
मबाक्तीके नु बोल मपाइशशो सेल्लती।

14 मेकोमी आं हेंथे पतीके जुवा खोदेशो सेल्लतु। मिनु मेको आ  
गुइमी फ्रेंसाक्व। मेको आं बला तारी शुश हेल्शो बाक्ब। मोपा आं  
बोल ग्युम्त। मिनु परमप्रभुमी आं कली आं ग्राने मचाप्चा डा मुर  
आन गुइमी गेती।

15 परमप्रभुमी आं दाते डा लडाइ पाइब नेल्ल आन कली प्रोंइतु।  
मुल मेकोमी आं कली वारच मपथु, आ ठिटा वोंइश मुर नेल्ल आन  
कली साइक्तु। परमप्रभुम अडगुर खाक्शो खोदेशो पा यहूदा डा  
कन्ने मीश आल, यरूसलेम कली खाक्शो बाक्ब। यसैया ६३:३

16 गो मार कली डाक्नुडा, मार कली आं प्रेक्क यीनीम देंशा हना,  
आं कली लेम्ब नु आं थुं बारपाइक्ब आ क्येडा डोन बाक्नीम। आं  
आल लने थुम्तेक्म। मारदे हना आं जोरी सत्रु आं क्येडा बोल्यो  
बाक्तेक्म।

17 सियोनमी पुंइचा कली आ गुइ दिंताक्व। तन्न आ थुं  
बारपाइक्ब सुइ मबाक्म। परमप्रभु यावेमी “याकूब आ नेक्था डा  
मुर आ जोरी सत्रु दुम्चा माल्नीम” दे अरेप्तु। मिनु मेको आन दातेम  
यरूसलेम ग्रान्ग्रा दिचा डा दुम्त। येरमीया १:८

18 परमप्रभु यावे ठीक पाइब बाकब। मारदे हना गो आ लोव्र काइ मटीब दुम्ती। तन्न गे जात जात डा मुर नेल्ल नेनीन। आं श्येत कोव्रडीन। आं मीश आल नु ठिटा वोंडश आल नेल्ल ग्याइशशा लाइक्चा पुंइसाक्म। येरमीया ३:४२; येरमीया ५:१६

19 गो आं दाक्शो मुर आन कली ब्रेत्ताक्ड। तन्न मेकोपुकीमी आं कली प्रोंइतीमी। आं चढेब नु खाल्पा आन बोल लेप्पाइक्चा कली जचा थोव्रक माल्न माल्ना सहरम बेक्तेक्म।

20 “परमप्रभु यावे कोव्रडीन, गो शुश श्येत जाता। गो इन देशो मटीब दुम्तीके आं थुं चोती। आं थुं साप्पा सेक्बेर पाइब। लाडगाम तरवारमी साइक्ब। मिनु खिं आगाम बेक्तीक बाक्ब।

21 मुरपुकीमी आं हुकयी पशो नेतेक्म। आं कली थुं बारपाइक्ब सुइ मबाक्नीम। आं जोरी सत्रु नेल्लेमी आं श्येत जशो आ पर्वम नेतेक्म। आं कली मोदेशो दुम्शो तशा ग्येरसाक्म। गे इन देशो नाक्त जाक्ल। मेकोपुकी यो आं खोदेशो पा श्येत जामेक्ल। येरमीया ४:२१

22 मेको आन मरिम्शो पशो नेल्ल इन डोंइती बाक्ल। मिनु गे आं हेंथे पशो आ पर्वम आं कली पशो खोदेशो पा मेको आन कली यो पतीन। गो शुश हुकयी पाइक्नुड। आं थुं लुकच लत” दैत।

## 2

### सियोन सुर्ता पशो

1 परमप्रभु गाइशशा, सियोन आ तमी कली मुने तोक्तु। इस्राएल आ दारस कली सरीड रे पा रागीमी तोक्तु। आ गाइशशो नाक्ती आंम खोइल वोइक्तीक सियोन कली यो प्रेंताक्व। भजन संग्रह १३२:७-८

2 परमप्रभुमी शिशी मपथु याकूब आ बाक्तीक नेल्ल खतम सेल्लु। मोपा चुरशा यहूदा आ तमी आ गारो हिरशो सहर नेल्ल खतम सेल्लु। मेकोमी मेको राज्य नु आ सासन पाइब आन कली मान मताइब, आइक्च सेल्लु।

3 मेकोमी शुश चुरशा, इस्राएल डा सक्ति नेल्ल खतम सेल्लु। मेकोमी आ जोरी सत्रु आन डोंइती सियोन कली वारच पचा प्रोंइतु। मेको याकूब आ बाक्तीके आ एर ओंथ नेल्ल ग्राव गृ दाक्ब मी खोदेशो दुम्त।

4 परमप्रभुमी सियोन आ जोरी सत्रु खोदेशो दुम्शा, आ लिब्रा कीतु। आ जोरी सत्रु खोदेशो दुम्त। आंइ दाक्शो नेल्ल आन कली साइक्तु। परमप्रभुमी आ चुरशो मी खोदेशो पा सियोन आ तमी आ ताम्बु तारी मोइक्तु।

5 मुल परमप्रभु सियोन आ जोरी सत्रु खोदेशो दुम्त। मेकोमी इस्राएल कली खतम सेल्लु। आ दरवार नेल्ल आन कली खतम पोक्तु। आ गारो डा लाइशो खिं नेल्ल प्रेत्तु। मिनु यहूदा आ तमी कली शुश रोंका नु हिशेक पपाइक्तु।

6 मेकोमी आंम ताम्बु कली रू डा कटेरा खोदेशो पा प्रेत्तु। मेकोमी आ बाक्तीके खतम सेल्लु। परमप्रभु यावेमी सियोनम चाड नु नाइक्तीक नाक्ती मानेतीक प्रोंइतु। आ शुश गाइशोम पिप नु चढेब नेल्ल आन कली मुने तोक्तु। अय्युब २:१३; येरमीया ५:१२

7 परमप्रभुम आंम कली चढेतीक नु आ बाक्तीके निम्फा प्रोंइतु। मेको आन दरवार डा गारो जोरी सत्रु आन गुइमी गेप्तु। मोपा मेकोपुकीमी परमप्रभु यावे आ खिंमी चाड डा नाक्त खोदेशो पा रेयके पाम्तेक्म।

8 परमप्रभु यावेमी सियोन आ तमी आ गारो प्रेत्त्या कली मिम्ताक्व। मेको आ तारी पुक्तीके कीतु। मेकोमी खतम सेल्ल्या कली आ गुइ मतेक्ग। मेकोमी गारो नु आ बोल्यो सेल्लतीके निक्शी कली रोंका पपाइक्तु। मिनु मेको कालेक्म ब्रेत्ताक्स। २राजा २१:१३

9 मेको आ ठेयब लाप्चो खपीम दोक्तेक्म। मेकोमी आ आग्लो जिक्शा खतम पोक्तु। मेकेर डा पिप नु आन तौ नेल्ल रागी रागी डा मुर आन दातेमी बाक्नीम। मेकेर लां कोंइब परमप्रभु यावे आ

अरेशो मबाकब। मिनु परमप्रभु यावे आ लोव्र पाइबपुकीमी परमप्रभु यावे रे पा मारेइ लोव्र मताइनीम।

10 सियोन डा खाल्पा खपीम निश्शा, सिक्सी पा बाक्नीम। मेकोपुकीमी आन पियामी फुरक फुंडसीनीम। मिनु भाडग्रा फेक्शा बाक्नीम। यरूसलेम डा मीश आलपुकीमी आन पिया खप सम्म बाप्पाइश्शो बाक्नीम।

11 गो डाक्ना डाक्न बाक्नुड। आं थुं चोइब। आं थुं खाइक्ब। मारदे हना आं मुर खतम दुम्तेक्म। आल नु दूध तूब आलपुकी सहर डा लांम शोव्रलु बेक्नीम।

12 मेकोपुकीमी आन ममा आन कली “जचा तूचा थोव्रक ते बाक्म” दे हिल्लो पाइनीम। मेकोपुकी सहर डा लांम गार दुम्शो लडाइ पाइब खोदेंशो पा थाइनीम। मिनु आन ममा आन थुकुम बेक्नीम।

13 ए यरूसलेम आ तमी, गो इ पर्बम मार देंडा? गो इ कली मार नु थाप्तु? ए सियोन आ कन्ने तमी इ थुं बारपाइक्चा कली इ कली मार नु थाप्तु? इ श्येत समुन्द्र खोदेंशो पा ठेयब बाक्ब। सुइम इ कली सापाइक्ने मचब।

14 इ परमप्रभु यावे आ लोव्र पाइब आन लोव्र नेल्ल जोल नु शोर गाक्शो बाक्तेक्म। मेकोपुकीमी इ कली रिम्शो दुम्ल, दे इ मरिम्शो पशो आ पर्बम लोव्र मपाम। तन्न मेकोपुकीमी इ पर्बम पशो लोव्र नेल्ल जोल नु दूली लां कांइब बाक्त। येरमीया १४:१४-१६; येरमीया २३:१६-२२

15 इ नेक्था रे पा लाइब नेल्लेमी इ कली तशा शुक्शी पाइनीम। यरूसलेम आ तमी तशा शुक्शी पा आन पिया हिन्नीम। मेकोपुकीमी “एको सहर कली नेल्ल क्येडा दारशो नु रागी डा नेल्ल क्येडा दाक्शो सहर देंनीमी, ममाइ डा?” देंनीम। भजन संग्रह ४८:३; इजीकीएल १६:१४

16 इ जोरी सत्रु नेल्लेमी इ पर्बम मरिम्शो लोव्र पा शुक्शी पाइनीम। मेकोपुकीमी आन गाइक्तीकेमी “गो मेको कली खतम सेल्लतक।

एको नाक्ती कोव्रचा कली रिम्ताक्क। मुल गो ताइतक” देंनीम।

17 परमप्रभु यावेमी मार मिम्ता नु डोंइती मार पाइनुड देंमे, मेको पाप्तु। साइ डोंइती हिंच कोइशा देंशो लोव्र मुल पाप्तु। मेकोमी शिशी मपथु, नेल्ल खतम सेल्लु। मिनु इ जोरी सत्रु आन कली इ पबर्म ग्येरपाइक्तु। इ जोरी सत्रु आन सक्ति ठेयब सेल्लु।

18 गे सियोन आ तमी, आ गारो परमप्रभु कली ठेयब सेंदा पा पुनो। इ प्रेक्क खोला खोदेंशो पा नाक्दो नाक्त यिपतो। याम का यो मनाइसो। शुश डाक्को।

19 बोक्को। नाक्दो डाक्शा पुनो। खाल पाइब आन गेय पची ना यो मो पावो। इ थुं डा श्येत परमप्रभु आ डोंइती ब्वाक्कु खोदेंशो पा लुक्तो। लांमी बाक्ब इ शोव्रलु बेक्शो आल आन पबर्म इ गुइ परमप्रभु गे पोक्शा पुनो।

20 “परमप्रभु यावे कोव्रडीन। गे सु कली ओदेंशो पा श्येत गेनी। मार मीश मुरपुकीमी आंम आल आन कली ब्वचा माल्नीमी? मार इन कली चढेब नु इन लोव्र पाइबपुकी इन बाक्तीकेमी साइक्चा पुंइसीचा माल्नीनी? ब्यवस्था २८:५३-५७; येरमीया १९:९

21 ठिटा नु खाल्पापुकी लांम गोल्लो बाक्नीम। आ ठिटी मीश मुर नु ठिटा वोंइश मुर तरवारमी साइक्चा पुंइसाक्म। गे इन गाइशो नाक्ती मेको आन कली शिशी मपाइक्थु साइक्तीनी।

22 गे एर ओंथ डा आं जोरी सत्रु आन कली चाड मानेचा कली खोदेंशो पा ब्रेत्ताक्नी। परमप्रभु यावे आ गाइशो नाक्तीमी सुइ मुर प्रोक्शा ब्रोंइचा मताइनीम। गो आं थिशो नु कोल्पाइशो आल आन कली आं जोरी सत्रुमी साइक्तेक्म” देंती।

### 3

मुर आन पबर्म रोंका पशो

1 परमप्रभु आ चुरशोमी आं कली कोक्केम तुप्ती।

2 मेकोमी आं कली खेदा पा छेडछेड रे छिडछिडमी गाकपाइक्ती।

3 मेकोमी नाक्त किंत किंत आं कली श्येत गेना गेन बाक्ब।

4 आं रां नु कुशुल नेल्ल सोत्रपाइक्ती। मिनु आं रुश जिक्तु।

5 मेकोमी आं कली सुर्ता पतीक नु श्येत जतीकेम पुम्शा गिल्पाइक्ती।

6 मेकोमी साइ नेसी डा बेक्शो मुर आन कली खोदेशो पा आं कली छिडछिडमी बाकपाइक्ती।

7 मेकोमी आं कली प्रोक्ने मचबल, दे चोक्ती। आं कली हेल्शो साडलोमी पाइक्ताक्यी।

8 गो “वारच पाइय्यीनी” दे शुश ब्रेत्ती। तन्न आं ब्रेशो नेंशा यो सिक्सी पा बाक्त। भजन संग्रह २२:३; भजन संग्रह ६९:४

9 मेकोमी आं लां ठेयब फुल्लुमी तेक्तु। मिनु आं लां हिरशो सेल्लु।

10 मेको ग्राम्चा कली बाप्शा बाक्शो वां खोदेशो बाक्ब। मिनु खुइशशा बाप्शा बाक्शो गुप्स खोदेशो बाक्ब।

11 मेकोमी आं कली आं लां रे पा लाइशशा, बेदर किदर पोक्ती। मेकोमी आं कली सुइ मपाइशशा सेल्लती।

12 मेकोमी आ लिब्रा कीशा, आं कली आप्ती।

13 मेको आ ब्रामी आं लुडगीर ख्रित्ताक्यी।

14 आं मुर नेल्ले आं पबर्म रिन्नीम। मेकोपुकी नाक्त किंत किंत आं पबर्म शुक्शी पा कुम्सो पाइनीम। अय्युब ३०:९

15 मेकोमी आं थुं खाइक्पाइशशा, आं कली कशो तूचा थोत्रक तूपाइक्ती।

16 मेकोमी आं कली फुल्लु जपाइशशा, पुलुमी निप्पाइक्ती।

17 गो थुं नाइशशा बाक्चा मताइक्नुड। ग्येरशा बाक्चा मार बाक्मे, मेको प्रेंताक्ड।

18 मोपतीके गो “आं दारस नेल्ल जाम्शा लत। गो परमप्रभु यावे रे ताइनुड, दे आस पशो यो नेल्ल जाम्शा लत” देंती।

19 आं श्येत आ पर्वम मिम्तीके नु आं खिं मबाक्तीके खाइल खोदेशो पा कशो दुम्ती।

20 गो मेको गेना हना यो मिम्नुड। मोपतीके आं थुं लुक्च लत।

21 तन्न गो परमप्रभु आ लोत्र फ्रुक्शा, आ लां कोत्रनुड।

22 परमप्रभु यावे आ गेना हना यो दाक्तीक गेनायो मनुण्ब। आ शिशी गेनायो मनुण्ब। नेहेम्याह ९:३१

23 मेको सुनी कुस कुस नक दुम्शो बाक्ब। इन देशो गेना हना यो थमा बाक्ब।

24 आं थुमी “परमप्रभु यावे आं भाग बाक्ब। मोपतीके गो मेको कली आस पाइनुड” देंती। भजन संग्रह १६:५; भजन संग्रह ३:२६

25 परमप्रभु यावेमी आ कली रिम्ब आन कली रिम्शो पाइब। सुमी मेको कली माल्नीमी, मेको आन कली रिम्शो पाइब।

26 सिक्सी पा परमप्रभु यावे आ श्येत रे प्रोंइतीके रिम्चा रिम्शो दुम्ब। रोमी ८:२५

27 ठिटा बाक्शो ना आंम जुवा कुरचा रिम्शो दुम्ब।

28 परमप्रभुमी मुर कली आ का ला सिक्सी पा बाक्चा गेप्टु हना, मेको कली रिम्शो दुम्ब।

29 मुरुमी आ शोत्र खपीम वोदल। मोपा मेको के आस बाक्बा कों?

30 मेको आ चोत्रचो राप्चा गेशा, शुश शुक्शी पाइक्चा पुंइसीब दुम्ब। मती ५:३९

31 परमप्रभुमी मुर आन कली आ डोंइती रे गेना हना यो मतिल्ब। यसैया ५४:८

32 मेकोमी श्येत गेप्टु हना यो, लेंशा शिशी पाइब। मेको आ गेना हना यो दाक्तीक थम ठेयब बाक्ब।

33 मारदे हना मेकोमी सुइ मुर आन कली श्येत गेचा मदाक्ब।

34 रागी डा जेल्खानम चोक्चा पुंइसीशो नेल्ल आन कली खोइलीमी दिम्नीम।

35 नेल्ल क्येडा ठेयब आ डोंइती मुर आन कली ठीक निसाफ मगेथु, दूली पाइनीम।

36 मुर आन कली दूली निसाफ पाइनीम। परमप्रभुमी मेको नेल्ल मताइबा डा?

37 परमप्रभुम मअरेशो गेय सुमी अरेने नु पपाइक्ने चाप्बा डा? यसैया ४५:७; आमोस ३:६

38 मार नेल्ल क्येडा ठेयब आ शोत्र रे रिम्शो नु मरिम्शो लोत्र मगूबा डा?

39 मारदे मुरुमी आंम पाप आन पबर्म सजाइ तामेनु, गन गन पाइनीमी?

40 गो आंम कली नाक्शा कोत्रशा, परमप्रभु यावे गे लेत्नय।

41 गो आंइ थुं नु गुइ स्वर्ग डा परमप्रभु गे पोक्कय।

42 गोपुकीमी हेंथे गाक्शा, इन देंशो काइ मटिक। मिनु गे आंइ कली माफ मगेनी। भजन संग्रह १०६:६

43 गे चुरशा आंइ कली खेदा पाइतीनी। काइ शिशी मपथु साइक्तीनी।

44 आंइ पुंइशो इन बाक्तीक मजाक्चा डा पा, गे गोस्सुमी गिल्साक्नी।

45 गे आंइ कली शुश जात डा मुर आन दातेमी ग्रांग्रा दिशो सेलतीनी।

46 आंइ जोरी सत्रु नेल्लेम आन शोत्र रोकशा शुक्शी पाम्तेक्म।

47 शुश हिंचा डा मरिम्शो दुम्तीक आंइ तार जाक्त।

48 आं मुर नेल्ल खतम दुम्शो तशा, गो शुश डाक्ती।

49 गो डाक्स डा डाक्स बाक्नुड। नाइक्चा मताइनुड।

50 परमप्रभु यावेमी स्वर्ग रे पा उइ मकोत्रडा सम्म मो पाइनुड। भजन संग्रह १०२:२०-२१

51 आं सहर डा मीश आल आन कली मरिम्शो दुम्शो तशा आं थुं खाइक्ती।

52 आं जोरी सत्रुमी आं कली मोशीन चिक्ब कली खोदेशो पा सिखार ग्यारतेक्म।

53 मेकोपुकीमी आं कली सेसीन खाल्टामी ताइक्ताक्यीमी। आं कली फुल्लुमी यो आप्तीमी।

54 ब्वाक्कुम आं पिया सम्म सुम्ती। मिनु गो “मुल आं ब्रोंइस ओशोन बाक्माक्त।

55 परमप्रभु यावे, शुश लुकच लशो खाल्टा रे पा गो इन नें थोव्रता।

56 गे आं थोशो लोव्र नेंतीनी। आं कली प्रोंइचा कली आ थोशो लोव्र नेनीन। इन नोफा मसुने। तन्न आं कली श्येत रे प्रोनीन।

57 गो इन कली थोडानु, गे आं नेक्था जाक्तीनी। मिनु आं कली ‘महिनी’ देंतीनी।

58 परमप्रभु गे आं कली वारच पाइक्तीनी। मिनु बेक्चा रे प्रोंइतीनी।

59 परमप्रभु यावे, गे आं कली पशो मरिम्शो नेल्ल ताइतीनी। आं कली निसाफ गेयीनी।

60 मेकोपुकीमी आं कली मरिम्शो पचा कली सल्ला पशो नेल्ल ताइतीनी।

61 परमप्रभु यावे, गे मेको आन आं कली हिंच कोंइशा पशो लोव्र नेल्ल नेंतीनी।

62 मेकोपुकी नेल्ल नाक्त आं पबर्म खुइश्शो लोव्र पा, नोफा मुइक्मुम्तेक्मे।

63 मेकोपुकी निस्सामानु, बोक्मानु, आं पबर्म शुक्शी पा कुम्सो पाइनीम। येरमीया ३:१४

64 परमप्रभु यावे, मेको आन पशो कोव्रशा, मेको आन कली क्येक्क लेत्तीन। येरमीया १:२१; भजन संग्रह १३७:८; १पत्रुस २:२३; १पत्रुस ३:९

65 मेको आन थुं सुम्शा गेन। इन सराप मेको आन कली रल।

66 मेको आन कली गाइश्शा खेदा पन। परमप्रभु यावे, सरीड आगा रे मेको आन कली खतम पोक्कीन” देंती।

## 4

### सियोन कली सजाइ

1 सुनमी आं दारस नेल्ल साम्तु। क्येख सुन मदारशो दुम्त। शुश क्येट लाइब हीरा नेल्ल लां मेर फ्राइसीशो बाक्नीम।

2 सियोन आ दाक्शो आलपुकी, डोंडती सुन खोदेशो मिम्शो बाक्तेक्म। मुल खप के ग्योंब खोदेशो दुम्तेक्म।

3 सिवारेम आन चाइक्ब आन कली दूध तुंडनीम। तन्न आं मुरपुकी काइ मरिम्शो दुम्तेक्म। मेकोपुकी गोरशो रागीम बाक्ब ठेयब चिक्ब खोदेशो दुम्तेक्म। अय्युब ३०:१४-१६

4 दूध तूब आल आन लें शुश तूतू दाक्शा, आन कुंकुमी खोक्ताक्ब। आलपुकीमी जचा थोत्रक पुंडनीम। तन्न सुइमी मेको आन कली मारेइ मगेनीम।

5 ब्रोत्रशो ब्रोत्रशो जाइबपुकी मुल लां मेर बेक्नीम। दारशो वासी फेक्शा कोल्शो मुल पुलु ताइक्तीकेम बाक्नीम।

6 मारदे हना आं मुर आन कली गेशो सजाइ सोदोम कली गेशो सजाइ क्येडा ठेयब बाक्त। मेको कली याम कामीन लोकचा पुंडसाक्ब। उत्पत्ती १८:२०; उत्पत्ती १९:२४-२५

7 मेकेर पिप आ तौपुकी फु नु दूध क्येडा बुश बाक्तेक्म। मेको आन रां मानीक हीरा क्येडा लल बाक्तेक्म। मेको आन चां नीर हीरा खोदेशो बाक्तेक्म।

8 मुल मेको आन रां कुंकी क्येडा क्येर दुम्तेक्म। मेको आन कली लां मेर यो सुइमी मतुइक्नीम। मेको आन कुशुल रुशेम केप्शो बाक्ब। मेकोपुकी शी खोदेशो पा सोत्रशो बाक्नीम।

9 जचा मतथु शोत्रलु पा बेक्बपुकी क्येडा तरवारमी क्योरशा साइक्चा पुंडसीबपुकी ग्येरसीशो बाक्नीम। रू डा फल मथित्थु, मेकोपुकी सोत्रशा लाइनीम।

10 ब्रेम्शो थुं पाइश्शो मीश मुरपुकीमी आंम आन आल क्येम्तेकम। मेको आन जचा थोव्रक दुम्त। गो आ मुर आन कली खतम सेल्टीके मोदेशो दुम्त। येरमीया २:२०

11 परमप्रभु यावेमी आ चुरशो नेल्ल कोइताकव। मेकोमी आ हिंचा डा पा गाइश्शो नेल्ल कोइताकव। मोपा सियोनम मी सुइक्ताकव। मिनु मेकेर डा जग नेल्ल दाकतु।

12 आ जोरी सत्रु यरूसलेम डा ठेयब लाप्चो रे पा ओव्रनीम, देशो रागी नेल्ल डा पिप नु मेकेर बाकब मुर सुइमी यो थमा सुइक्ने मचबेम।

13 परमप्रभु यावे आ लोव्र पाइब आन पाप नु चढेब आन मरिम्शो पशो आन पबंम मो दुम्शो बाक्त। मेकोपुकीमी सहर आ दातेम ठीक पाइब मुर आन कली हुश खाक्श पोक्तेकम।

14 मेकोपुकी मिक्च मताइब खोदेशो पा लां मेर हिरसाकम। मेकोपुकी हुश लुम्सीशो बाक्तेकम। मेको आन वा सुइम मथिचा डा बाक्त।

15 मुरपुकीमी मेको आन कली “लने, ए ग्रांग्रा दिशो मुर आंइ कली मथिने” दे ग्रीनीम। मोपतीके मेकोपुकी प्रोक्ब नु हिरब मुर दुम्तेकम। रागी रागी डा मुरपुकीमी “मुल मेको गोपुकी नु बाक्चा मताइनीम” देंतेकम। लेवी १३:४५

16 परमप्रभु यावेमी मेको आन कली मोपा ब्रपाइक्तीमी। मुल लेंशा मेको आन कली शिशी मपाइक्ब। सुइमी चढेब आन कली मान मपामे। खाल्पा आन कली यो महिकगेम। येरमीया २:६; येरमीया ५:१२; लेवी १९:३२

17 वारच पाइब जाकबा, कों देशा लां कोव्रशा मिक्च चोप्तु। रागी कामी आंइ कली वारच पाइबा कों, दे कोव्रशा बाक्तक। तन्न मेकोमी आंइ कली प्रोइने मचब।

18 मुरपुकीम आंइ नोले खोइक्तेकम। मोपतीके गो आंइ लांमी गाक्ने मचाप्क। आंइ बेक्तीक नाक्ती जाक्त। आंइ नाक्त नुप्शो बाक्तेकम। गो बेक्चा चिक्तक।

19 आंइ कली खेदा पाइबपुकी सरीडम बेरब ककाकुली क्येडा यो रीब पा जाक्तेक्म। मेकोपुकीमी आंइ कली पहाडम खेदा पाम्तेक्म। गोरशो रागीमी बाप्शा बाक्तेक्म।

20 मेकोपुकीमी परमप्रभु यावे आ तेल लुक्शो, आंइ कली ब्रोंइचा गेब कली ग्याइक्ताक्म। मेको आ पर्बम गोपुकीमी “मेको आ वांकुम रागी रागी डा मुर आन दातेम बाक्नीकी” दे मिम्शो नकी।

21 एदोम आ तमी ग्येरसो। गे ऊज रागीम बाक्नेवे। तन्न गे यो मेको श्येत डा कचौरा तूचा माल्नेवे। गे दुक्नेवे। मिनु शिन्ना सेल्सीनेवे। येरमीया ३:६४; भजन संग्रह १३७:७; येरमीया २५:१५, २१

22 सियोन आ तमी इ हेंथे गाक्शो डा सजाइ नुप्त। मेकोमी इ कली ग्याइश्शा लाइश्शो रागी रे गुंडब। तन्न एदोम आ तमी, इ हेंथे गाक्शो डा सजाइ ताइनेवे। मेकोमी इ पाप कांडब। यसैया ४०:२; यसैया ३४:८-१०; इजीकीएल ३५:१४-१५

## 5

### शिशु पन, दे प्रार्थना पशो

1 मिनु “परमप्रभु यावे, गो आंइ कली मार दुम्शो बाक्बा, मेको मिम्तीन। आंइ कली मरिम्शो पशो कोव्रडीन।

2 आंइ थेरशो रू अर्को रागी डा मुर आन के दुम्त। आंइ खिं यो अर्को रागी डा मुर आन के दुम्तेक्म।

3 गोपुकी रोम रोइक्च दुम्तक। आंइ ममा वोंइश बेक्शो मीश मुर खोदेशो दुम्तेक्म।

4 गोपुकीमी तूचा ब्वाक्कु यो ग्याप्चा माल्नीकी। शी यो ग्याप्चा माल्नीकी।

5 गोपुकी जुवा लाप्शो खोदेशो पा आंइ कली खेदा पाइनीम। गोपुकी दशो बाक्नीकी। तन्न नाइक्चा मताइनीकी। प्रस्थान २०:५; येरमीया ३१:२९

6 गो इजीप्त नु अस्सुर रागी नु जचा थोत्रक तचा कली सल्ला पाइतक।

7 आंइ किकी पिपीमी पाप पाम्तेक्म। मिनु बेक्तेक्म। गोपुकी मेको आन हेंथे पशो राइतक।

8 वाइलपुकीमी आंइ कली हुकुम पाइनीम। आंइ कली मेको आन गुइ रे पा प्रोंइब सुइ मबाक्नीम।

9 गोपुकीमी आंइ जचा थोत्रक बेक्चा डा गोरशो रागीम लशा, चाक्चा माल्नीकी।

10 गो शोत्रलु बेक्तीके आंइ कुशुल चुप्लु खोदेशो पा होश दुम्त।

11 सियोनम मीश मुर आन कली बिथोलो पाइनीम। यहूदा सहरम कन्ने मीश आल आन कली बिथोलो पाइनीम।

12 मेकोपुकीमी सासन पाइब आन कली क्युक्शा साइक्तेक्म। खाल्पा आन कली मान मपामे। २राजा २५:१९-२१

13 ठिटापुकीमी श्येत पा यात हिल्चा माल्नीम। वोंइश आलपुकीमी शी कुरशा गोल्चा चिक्शा गाक्नीम।

14 खाल्पापुकी सहर डा ठेयब लाप्चोमी गुम्शा बाक्चा प्रोंइतेक्म। मिनु ठिटापुकीमी बाजा ताप्चा प्रोंइतेक्म।

15 आंइ थुं रे पा ग्येरशा बाक्तीक जाम्त। गो आंइ सिल पतीक नेल्ल रोंका पतीके दुम्त।

16 सिरपेच आंइ पिया रे दोक्त। आबी, गो पाप पाइतक। येरमीया १३:१८

17 मोपतीके आंइ थुं खाइक्त। मिनु आंइ मिक्च ब्रा ब्रा दुम्त।

18 सियोन डांडाम श्येत दुम्त। मेको सिवार आन बाक्तीके दुम्त।

19 तन्न गे, परमप्रभु यावे गेना हना यो सासन पाइनीनी। इन सासन पतीके नेल्ल पाला सम्म लीब।

20 गे मारदे आंइ कली प्रेंदीनी? गे मारदे आंइ कली इश डा नाक्त सम्म प्रोंइनी?

21 परमप्रभु यावे, आंइ कली इन गे लेप्पाइक्की। मिनु गो थमा पा इन गे लेत्नीकी। आंइ नाक्त डोंइती डा खोदेशो सेलीन। भजन संग्रह १२६:

22 गे आंइ कली थमा पा मप्रोंइशो बाक्तीनी हना नु आंइ तशा शुश मगाइशो बाक्तीनी हना, मोदेशो दुम्ल” दे पुंइतक ।

## परमप्रभु यावे आ लोत्र

### **Bible in Sunwar (NP:suz:Sunwar)**

copyright © 2011 Wycliffe Bible Translators, Inc.

Language: Sunwar

Translation by: Wycliffe Bible Translators, Inc.

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937101646

**The Bible without Deuterocanon**

in Sunwar

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

27cd6a1c-0244-5add-a4e8-b4f0e5104473